



Consecraziun da la baselgia claustrala
Suenter 300 onns ha in nunzi papal consecrà la baselgia claustrala da Mustér. In mument istoric.

5



L'affar dependa da bell'aura
L'ustier dal kiosk al Lai Barnagn tira bilantscha da l'ultima stagiun da stad.

8

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Sesiun da skis: Adina pli baud

■ (anr/gns) Grazia a la naiv prematura avran la proxima fin d'emna intginas pendicularas grischunas. Las relaziuns per ir cun skis sajan idealas cun avair dà sur 1500 meters sur mar blera naiv. Ina raschun è er ch'uscheprest che la naiv è qua en il mais da november vulan blers ir cun skis. La sta-

giun d'enviern 2019/20, quella cumenza a partir da damaun ad Arosa, Andermatt, Tavau ed a San Murezzan. Avertas èn dapi la davosa fin d'emna alura er intginas loipas, gist a Lai, Tavau ed en l'Engiadina Auta.

> PAGINA 9



Duri Lutz muossa ad Andreas Lack in detagl dil tetg curclaus. Sper el Gabriel Beeli.

FOTO A. BEELI

Baghetgs characteristics

■ (anr/abc) Gliendisdis han ils responsabels da Berna dil Fondo svizzer per la cuntrada inspectau la lavur dalla fundaziun Cuntrada cultivada Val Medel. Treis tagliaslondas han luvrau ils dus onns vargai per la fundaziun. Avon 15 onns han ins scalfiu ella Val Medel ina fundaziun aposta per promover quell'ierta culturala. Grazia a treis habitonts dalla Val han ins era saviu instradar la lavur pratica. Per garantir las finanzas ha la fundaziun encuretget il contact cul Fondo svizzer per la cuntrada (FSC). Quell'in-

stituziun dat buca semplamein daners, mobein promovava investiziuns. Entochen oz ha ella aschia saviu promover talas ella valeta d'ina mesa milliarda francs. Aschia daners drova ei buca per mantener ils baghetgs agricols characteristics dalla Val Medel. Ils treis tagliaslondas Gabriel Beeli, Venanzi Flepp e Duri Lutz ein ils pratichers, ils tagliaslondas. La cuntinuaziun ei garantida ed era ils treis tagliaslondas ei motivai da far vinavon.

> PAGINA 3

Eruir la futura utilisaziun dal Trü

■ (anr/afi) L'implant da sport Trü procura annualmaing per cuosts pel cumün da Scuol e stess gnir renovà. Insembel cun la populaziun as voula chattar üna soluziun dürabla per quist areal. L'is onns 1960 es gnü fabricchà l'implant da sport Trü e quai dal cuntschaint büro d'architectura Hae-feli Moser Steiger. L'idea dals iniziants e da la Società da cura da Scuol d'eira da spordscher in ün lö central ün implant multifunziunial per differents sports d'inviern e da stà. Ils cuosts da passa

400 000 francs, cha la gestiun da Trü procura actualmaing per on, han dat andit a la direziun cumünala d'ir in tschercha per novas soluziuns per quist areal. Las trais sairadas d'infuormaziun cha'l cumün da Scuol vaiva organisà a regard l'avegnir da Trü sun statta bain frequentadas. In ün prossim pass as voula eruir cun l'agüd d'ün questunari fin la fin da quist on l'opiniun da la populaziun.

> PAGINA 7

Il chastè cumplischa 980 ons

On turistic 2020 suot l'insaina da differents giubileums

DA FLURIN ANDRY / ANR

■ Da l'on 1040 han ils signurs da Tarasp laschà fabricchar sül-la collina immez cumün ün chastè. Quel es dvantà üna da las grondas attraziuns da la destinaziun turistica. «Mincha on van 15 000 persunas a Tarasp e's laschan manar tras ils pietans e la müraglia dal chastè», disch Madeleine Papsi chi maina ils secuturs mezs d'infuormaziun, marca e content da la Turissem Engiadina Scuol Samignun Val Müstair SA, «uossa cha l'artist Not Vital es proprietari dal chastè es quel stabel istoric dvantà üna sporta specifica eir per amatuors d'art.» Da tschella vart vain visità il chastè da famiglias e da quels chi s'interessan pels temps passats. «In quai chi riguarda l'art vaina in Engiadina Bassa sper il chastè da Tarasp eir il center per art contemporanea a Nairs ed a Susch il Muzeum», manzuna ella, «ed in connex culs edificis istorics vaina ultra da quist chastè stabels vegls eir a Ramosch, Ardez e Zernez ed impustüt eir la clostra Son Jon a Müstair chi posseda il label da



Il chastè da Tarasp attira tant als amatuors da stabilimaints vegls sco eir a quels chi s'interessan per l'art.

FOTO B. STECHER

l'Unesco.» Ils ulteriurs giubileums chi gnaran commemorats dürant l'on 2020 sun ils 300 ons daspö ch'üna lavina ha separà las duos parts dal cumün da Ftan. La

cuorsa da passlung Scuol-Martina vain realisada quist on chi vain pella 45avla jada, il ClauWau in Samignun pella 20avla jada e'l Maraton Engiadinais cul velo pel-

la 15avla jada. Eir daspö 15 ons vain celebrada in Val Müstair la Festa da la racolta.

> PAGINA 7

Calender Romontsch 2020 ei cumpariu

■ (mc) Il «Calender Romontsch», fundaus 1858 da Placi Condrau, cumpara uonn en sia 161avla annada. Dapi 1988 vegn el edius dalla Samedia a Cuera e dapi treis onns segna Lisa Schmidt-Candinas sco responsabla per la redacziun. Era uonn eis ei reussiu ad ella da gudignar numerusas collaboraturas e numerus collaboratur e da cumpilar sin passa 250 paginas in annuari pulpiu, variont ed informativ. Sco tematicas centralas per la novissima ediziun ha la redactura tscharniu il fash tematic credo/cardienscha ord l'optica fetg differenziada e cuntraversa da teologs e laics, umens e dunnas, giuvens e vegls. Ina seria d'artechels illustrai ei dedicata al grond diember da museums, casas da cultura ed archiv cultural en Surselva. Ina contribuziun pli liunga s'occupa dallas relaziuns linguisticas en Belgia, targend parallelas cun la Romontschia. Presentai vegnan ils giubileums dalla Chasa Editura Rumantscha (10 onns) e dalla Fundaziun Retoromana (50 onns) ed il Dicziunari Rumantsch Grischun (DRG) ch'ei uss online. Buca muncar astgan s'entelli la rubrica litterara, las indicaziuns calendaricas, la memoria da nos morts ed in mini-calender statal.

> PAGINA 5

Risch Curau da Trin

Johann Clopath ha presentau in piunier

DAD AUGUSTIN BEELI / ANR

■ Uonn eis ei 150 onns dapi la naschienscha dil construider da punts piarsas Richard Coray. All'entschatta ha il referent Johann Clopath rendiu attent pertuccont il num: Ella litteratura dil fatg vegni quel indicau sco Richard Coray. Remo Casty, in sut-

nevs, ha rendiu attent ch'ins enconuschevi el a Trin sco Risch Curau. Il construider da punts piarsas ha empriu da lennari, quei mistregn ei staus pissiu e vocaziun. En cercchels d'inschigniers da construcziun da punts vala Richard Coray aunc oz sco in dils megliers construiders da punts piarsas da tut ils temps. Savens ha

el luvrau per la Viafier retica. En siu referat ha Clopath era raquintau dalla famiglia. Suenter che sia emprema dunna fuva morta ei Risch Coray semaridau 1931 cun Christine Palmy ed ha viviu tochen sia mort 1946 a Tagn/Wiesen.

> PAGINA 3



Risch Coray (giudem enamiez) silla punt piarsa ch'el ha construü per baghegiar la punt da Solas.

MAD